

Broj: 01-02-1079/25
Sarajevo, 29. 5. 2025. godine

Z A P I S N I K
S 21. REDOVNE SJEDNICE PREDSTAVNIČKOG DOMA PARLAMENTA
FEDERACIJE BiH, održane 28. 5. 2025. godine

Sjednica je počela u 10:13 sati.

Sjednicom je predsjedavao Dragan Mioković, predsjedavajući Predstavničkog doma.

Nakon intoniranja himne Bosne i Hercegovine, predsjedavajući Mioković pozdravio je zastupnice i zastupnike, goste, kao i predstavnike akreditovanih medijskih kuća koji prate rad sjednice.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zastupnica Edina Gabela opravdala je svoj izostanak.

Potom je na glasanje stavljen Zapisnik s 20. redovne sjednice:

Sa 68 glasova *za*, 7 uzdržanih i 2 glasa *protiv* usvojen je Zapisnik s 20. redovne sjednice.

Stavljen je na glasanje Zapisnik s 14. vanredne sjednice: sa 67 glasova *za*, 8 uzdržanih i bez glasova *protiv* usvojen je Zapisnik s 14. vanredne sjednice.

Stavljen je na glasanje Zapisnik s 15. vanredne sjednice: s 55 glasova *za*, 4 uzdržanih i 3 glasa *protiv* usvojen je Zapisnik s 15. vanredne sjednice.

Na glasanje je stavljen Prijedlog zaključka koji glasi:

ZAKLJUČAK

Zadužuje se Vlada FBiH da kvartalno dostavlja informaciju o preduzetim i planiranim mjerama i aktivnostima te postignutim rezultatima u sanaciji i obnovi područja pogođenim poplavama, razmatra svaka tri mjeseca, kvartlano, umjesto jednom mjesečno po ranije usvojenom Zaključku na Predstavničkom domu od 28. 11. 2024. godine.

S 51 glasom *za*, 16 uzdržanih i s 1 glasom *protiv* usvojen je navedeni Prijedlog zaključka.

Zastupnička pitanja

Razim Halkić uputio je pitanje koje se odnosi na izmjene i dopune boračkog zakona, odnosno Zakona o dopunskim pravima boraca i RVI, u smislu dokle se došlo s izmjenama Zakona koje su tražene od boračkih udruženja.

Na pitanje zastupnika Razima Halkića odgovorio je **Nedžad Lokmić** u ime Federalnog ministarstva za pitanja boraca i invalida Odbrambeno-oslobodilačkog rata.

Mahir Mešalić zamolio je da od sada odgovori budu što kraći i precizniji kako bi ostalo dovoljno vremena i za druge zastupnike u zastupničkom satu.

Ivan Boban uputio je pitanje Federalnom ministarstvu prometa i komunikacija, a odnosi se na dodijeljena sredstva aerodromima u martu 2024., odnosno jesu li javna preduzeća dostavila završne izvještaje o utrošku sredstava?

Slaven Raguž prvo pitanje uputio je federalnom ministru za raseljena lica i izbjeglice Nerinu Dizdaru: na osnovu kojih su kriterija odbijeni studenti koji su se prijavili na poziv za “jednokratnu pomoć studentima i povratnicima” te iz kojih razloga i na osnovu kojih kriterija niti jedan student iz općine Gornji Vakuf-Uskoplje nije ostvario takvo pravo? Drugo pitanje upućeno je direktoru Agencije za bankarstvo Jasminu Mahmuziću, a odnosi se na poslovanje kontroverzne firme *Norinko* u BiH. Također se osvrnuo i na upućeni amandman koji se odnosi na zabranu poslovanja s pravnim subjektima i fizičkim licima, koji se mogu dovesti u vezu s trgovinom oružjem.

Sanel Kajan postavio je pitanje Vladi FBiH: je li tačna informacija da Vlada FBiH milionskim sredstvima finansira izgradnju zgrade Hrvatskog narodnog kazališta u Mostaru, kao i ima li Vlada dokaze da Hrvatsko narodno kazalište u Mostaru posjeduje sve potrebne građevinske dozvole? Također je upitao planira li Vlada prekinuti s praksom finansiranja ove pozorišne kuće dok se ne utvrdi puna zakonitost ovog projekta?

Mahir Mešalić prvo pitanje postavio je ministrici prometa i komunikacija Adrijani Katić: zašto se BH Telecom zadužuje 745 miliona i po kojim kamatnim stopama te kako je moguće da su takve informacije tajne jer je većinski vlasnik BH Telecoma Federacija te stoga, rekao je, građani Federacije zaslužuju da imaju te informacije. Drugo pitanje upućeno je direktorima Javnog preduzeća *Autoceste* i Javnog preduzeća Ceste Federacije BiH, koliko je i u kolikom iznosu poslovano s kompanijama Koning d.o.o. i Eurosajaj d.o.o. Treće je pitanje upućeno premijeru FBiH, sekretaru Vlade FBiH, predsjedavajućim oba doma federalnog Parlamenta, kao i sekretarima oba doma: koje su stručne spremne svih savjetnika u Vladi FBiH, kao i savjetnika u rukovodstvu Predstavničkog doma i Doma naroda.

Haris Šabanović je izvijestio predsjedavajućeg da će svoje vrijeme ustupiti zastupniku Asimu Kamberu.

Asim Kamber pitanje je uputio federalnom ministru unutrašnjih poslova Rami Isaku, a odnosi se na akciju *Kocka*, koja je nedavno provedena na području Sanskog Mosta. Upitao je ko je sačinio operativni plan akcije te je li, kako je rekao, sva “predstava bila neophodna u gradu koji je doživio genocid”. Zastupnik Asim Kamber ponovio je još jednom kako želi da mu se dostavi operativni plan akcije te da istovremeno želi znati kakvo je trenutno stanje na području bezbjednosti u gradu u kojem nakon hapšenja nedostaje četvrtina najsposobnijih policajaca.

Predsjedavajući Dragan Mioković upozorio je zastupnika Asima Kambara na pitanja koja postavlja, skrenuvši pažnju da se, prilikom postavljanja zastupničkih pitanja, vodi računa o nadležnostima izvršne i zakonodavne vlasti.

Na pitanje zastupnika Asima Kambara, nakon kratkog obrazloženja, ministar **Ramo Isak** odgovorio je zastupniku Kamberu, kazavši da zastupnici nemaju pravo vršiti procjenu rada policijskih službenika i da policijski službenici rade po nalogu Tužilaštva. Naglasio je kako nije istina da su u akciji korištene duge cijevi, kao ni onoliki broj vozila koliko je naveo zastupnik Kamber, dodavši kako nema potrebe da se razgovara o akciji koja je još operativna, a da se za sva pitanja može obratiti Tužilaštvu.

Amir Purić uputio je pitanje ministru Lakiću: ima li resorno ministarstvo u ovom trenutku procjenu kakav će uticaj na cijene električne energije proizvedene u FBiH, na unutrašnjem dijelu tržišta, imati primjena mehanizma za granično prilagođavanje ugljika, odnosno kako će se to odraziti na poslovanje dviju elektroprivreda u vlasništvu Federacije BiH.

Marijana Šikuljak-Hrvić uputila je pitanje Vladi FBiH i premijeru Nerminu Nikšiću, a pitanje se odnosilo na fiskalne reforme: kako je vršena analiza koja je prethodila povećanju minimalne plate, je li urađena simulacija uticaja na sektore s posebnim akcentom na mikro i mala preduzeća te zašto prvo nije provedena reforma smanjenja doprinosa. Jednu inicijativu uputila je za hitno rješavanje problema u Federaciji nastalih zbog ishitrenog i neopreznog donošenja odluke Vlade FBiH o minimalnoj plati. Zastupnica je naglasila da je odluka o povećanju plate donesena bez odgovarajućeg tranzicijskog perioda i predložila da Vlada hitno usvoji paket mjera za očuvanje radnih mjesta.

Alma Kratina uputila je inicijativu premijeru Nerminu Nikšiću i resornom ministarstvu za hitno i urgentno donošenje podzakonskih akata iz člana 89. Zakona o ustanovama socijalne zaštite FBiH, a istovremeno i federalnim ministarstvima pravde, obrazovanja i zdravstva, da se normira sve ono što je potrebno normirati vezano za standarde kako bi to bio preduslov za rješavanje finansijskih problema.

Belmin Zukan uputio je inicijativu koja se odnosi na Ministarstvo za pitanja boraca, a inicijativa je usmjerena donošenju uredbe o penzionisanju dijela populacije kojima su prava ostala uskraćena zbog revizije invaliditeta.

Jasmina Bišćević-Tokić uputila je pitanje Vladi FBiH, Federalnom ministarstvu prometa i komunikacija i rukovodstvu Međunarodnog aerodroma Sarajevo, zatraživši dostavu precizne informacije o statusu nekretnine, tačnije hangara koji je koristila kompanija *BH Airlines*, odnosno kakav je trenutni status ove nekretnine, provode li se aktivnosti na promjeni statusa te nekretnine, radi li se na njenoj prodaji, iako je ta nekretnina u restriktivnoj zoni graničnog prelaza *Aerodrom Sarajevo*.

Almedin Aliefendić prije nego što je uputio zastupničko pitanje, uputio je urgenciju jer odgovor na zastupnička pitanja sa 19. redovne sjednice, koja je uputio Federalnom ministarstvu finansija i Poreznoj upravi FBiH, nije dobio. Zastupničko pitanje sa 21. redovne sjednice upućeno je Federalnom ministarstvu finansija, u vezi s mišljenjem Ustavnog suda na zahtjev dopremijera Tonija Kraljevića kojim se nalaže kantonalnim skupštinama te gradskim i općinskim vijećima da iz svojih propisa uklone odredbe koje propisuju obavezu plaćanja komunalne naknade za istaknutu kompaniju, rapolaže li Federalno ministarsvo finansija podacima o tome koje su općine i gradovi uskladili svoje propise s navedenim mišljenjem. Drugo pitanje odnosi se na finansiranje političkih stranaka iz budžeta FBiH, zatraživši da mu se dostavi kolika su ukupna budžetska sredstva isplateni političkim strankama u 2024. godini i kolika su sredstva isplateni političkim strankama u prvih šest mjeseci tekuće, 2025. godine.

Melika Mahmutbegović prvo pitanje postavila je Federalnom ministarstvu razvoja, preduzetništva i obrta, a odnosi se na Uredbu o mjerama finansijske pomoći privatnim poslodavcima. Drugo pitanje odnosi se na Federalno ministarstvo energetike, rudarstva i industrije: postoji li urađen elaborat i čija je odluka da se iz Bugojna izmjesti jedan pogon namjenske proizvodnje. Treće pitanje zastupnica će, zbog isteka vremena, dostaviti u pisanoj formi.

Mario Karamatić prvo pitanje uputio je ministru Rami Isaku, a odnosi se na hapšenja migranata u Posavini u februaru 2024., upitavši preduzima li Federalna uprava policije ikakve izvide otkud migrantima oružje, na što je dobio odgovor da Federalna uprava policije nema saznanja da na teritoriji FBiH borave naoružani migranti. Ponovljeno je pitanje glasilo: postoje li nova saznanja, nakon nereda koji su se desili u predgrađu Sarajeva. Drugo pitanje upućeno je ministru Adnanu Deliću: imaju li pravo zapošljavanja u federalnom Parlamentu samo osobe iz Kantona Sarajevo ili to pravo imaju i osobe iz drugih mjesta u Federaciji?

U diskusiji o izmjenama i dopunama dnevnog reda učestvovali su: Mirza Čelik, Mahir Mešalić, Mirsad Zaimović, Damir Mašić, Adisa Kokić-Hinović, Jasmina Bišćević-Tokić,

Haris Šabanović, Purić Amir, Kenela Zuko, Nikšić Damir, Adnan Efendić, Salko Zildžić, Almedin Aliefendić, Marijana Šikuljak-Hrvić i Admir Čavalić.

Na glasanje je stavljen prijedlog zastupnika Almedina Aliefendića da se u dnevni red uvrsti deklaracija o podršci uvođenju modernih tehnologija na općim izborima 2026. godine.

Zastupnik Almedin Aliefendić je zatražio pojedinačno izjašnjavanje. Nakon pojedinačnog izjašnjavanja, s 45 glasova *za*, 40 uzdržanih i bez glasova *protiv*, navedeni prijedlog nije usvojen.

Na glasanje je stavljen prijedlog zastupnika Kenele Zuko i Mahira Mešalića da se u dnevni red uvrsti Prijedlog Zakona o izmjenama i dopunama Zakona o pravima demobilisanih boraca i članova njihovih porodica. S 38 glasova *za*, 37 uzdržanih i 3 glasa *protiv* navedeni prijedlog nije usvojen.

Na glasanje je stavljen prijedlog Vlade FBiH da se u dnevni red uvrsti Prijedlog Zakona o izmjenama i dopunama Zakona o naftnim derivatima u FBiH, koji sa 43 glasa *za*, 25 glasova *protiv* i sedam uzdržanih - nije usvojen. Zastupnik Mahir Mešalić zatražio je pojedinačno izjašnjavanje. Nakon pojedinačnog izjašnjavanja, sa 52 glasa *za*, 5 uzdržanih i 30 glasova *protiv* usvojena je dopuna dnevnog reda.

Na glasanje je stavljen prijedlog Vlade FBiH da se u dnevni red uvrsti Prijedlog Zakona o dugu, zaduživanju i garancijama u FBiH. Sa 48 glasova *za*, 4 uzdržanih i 33 glasa *protiv*, navedeni prijedlog nije usvojen.

Zastupnik Damir Mašić zatražio je pojedinačno izjašnjavanje. Nakon pojedinačnog izjašnjavanja, s 50 glasova *za*, 3 uzdržanih i 35 glasova *protiv*, usvojena je dopuna dnevnog reda.

Na glasanje je stavljen prijedlog Mirze Čelika da se u dnevni red uvrsti informacija o proglašenju epidemije leptospiroze u Kantonu Sarajevo. Sa 38 glasova *za*, 30 uzdržanih i 12 glasova *protiv* navedeni prijedlog nije usvojen. Zastupnik Mirza Čelik zatražio je pojedinačno izjašnjavanje. Nakon pojedinačnog izjašnjavanja, sa 39 glasova *za*, 27 uzdržanih i 18 glasova *protiv* navedena dopuna dnevnog reda nije usvojena.

Na glasanje je stavljen prijedlog Vlade Federacije da se Prijedlog Zakona o izmjenama i dopunama Zakona o naftnim derivatima u FBiH razmatra po hitnom postupku. Sa 49 glasova *za*, 3 uzdržanih i 32 glasa *protiv* navedeni prijedlog nije usvojen. Zastupnik Damir Mašić zatražio je pojedinačno izjašnjavanje. Nakon pojedinačnog izjašnjavanja, sa 49 glasova *za*, 3 uzdržanih i 30 glasova *protiv* navedeni prijedlog nije usvojen.

Na glasanje je stavljen prijedlog Vlade FBiH da se Prijedlog Zakona o dugu, zaduživanju i garancijama u FBiH razmatra po hitnom postupku. Sa 48 glasova *za*, bez uzdržanih i s 33 glasa *protiv*, navedeni prijedlog nije usvojen.

Zastupnik Damir Mašić zatražio je pojedinačno izjašnjavanje. Nakon pojedinačnog izjašnjavanja, sa 50 glasova *za*, bez uzdržanih i s 37 glasova *protiv*, navedeni je prijedlog usvojen.

Predsjedavajući je konstatovao da je prilikom pojedinačnog izjašnjavanja o hitnosti postupka Zakona o naftnim derivatima došlo do tehničke greške.

U diskusiji o ovom pitanju učestvovali su: Mahir Mešalić, Jasmina Bišćević-Tokić, Damir Mašić, Mirsad Zaimović, Dennis Gratz, Mirza Batalović, Haris Šabanović, Admir Čavalić, Mirza Čelik, Alma Kratina, Hajrudin Žilić i Fahurudin Skopljak.

Predsjedavajući je dao pauzu od pet minuta da bi se formirao zaljučak.

Na glasanje je stavljen sljedeći:

ZAKLJUČAK

Budući da je uvidom u stenogram i pregledom popisa o glasanju utvrđeno da je broj zastupnika koji su glasali da Zakon o naftnim derivatima ispunjava uslove za hitni postupak,

iako je prvim brojanjem službe nađeno 49 glasova *za*, kako bi se raščistile sve sumnje, Predstavnički dom će se ponovo izjasniti o spornom pitanju, odnosno o tome da li Zakon o naftnim derivatima ispunjava uslove za hitni postupak.

Sa 50 glasova *za*, 1 uzdržanim i s 2 glasa *protiv*, navedeni Zaključak je usvojen.

Zastupnik Mahir Mešalić zatražio je pojedinačno izjašnjavanje. Nakon pojedinačnog izjašnjavanja, sa 51 glasom *za*, bez uzdržanih i s jednim glasom *protiv*, usvojeno je da se Prijedlog Zakona o naftnim derivatima razmatra po hitnom postupku.

Sa 49 glasova *za*, 2 uzdržanih i s 20 glasova *protiv*, nije usvojen dnevni red 21. redovne sjednice.

Zastupnik Damir Mašić zatražio je pojedinačno izjašnjavanje. Nakon pojedinačnog izjašnjavanja: sa 51 glasom *za*, 5 uzdržanih i 29 glasova *protiv*, usvojen je sljedeći dnevni red 21. redovne sjednice:

D N E V N I R E D

1. Prijedlog Zakona o izmjenama i dopunama Zakona o naftnim derivatima u Federaciji BiH – hitni postupak,
2. Prijedlog Zakona o dugu, zaduživanju i garancijama u Federaciji BiH – hitni postupak,
3. Prijedlog Zakona o gradu Kiseljaku – skraćeni postupak,
4. Prijedlog Zakona o izmjenama i dopunama Krivičnog zakona Federacije BiH,
5. Nacrt Zakona o gasu Federacije BiH,
6. Program rada Predstavničkog doma Parlamenta Federacije BiH za 2025. godinu,
7. Izvještaj Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije BiH za 2021., 2022. i 2023. godinu,
8. Prijedlog zaključka Odbora za ekonomsku i finansijsku politiku Predstavničkog doma Parlamenta Federacije BiH,
9. Program rada Vlade Federacije BiH za 2025. godinu,
10. Izbori i imenovanja.

1. Prijedlog Zakona o izmjenama i dopunama Zakona o naftnim derivatima u Federaciji BiH – hitni postupak

Prijedlog zakona utvrdila je Vlada FBiH.

Prijedlog zakona razmatrala su nadležna radna tijela, o čemu su dostavila izvještaje.

Dodatno obrazloženje dao je resorni ministar.

U ime Odbora za energetiku obratio se Kadrija Hodžić.

Na prijedlog ovog zakona jedan amandman podnio je zastupnik Admir Čavalić.

U diskusiji niko nije učestvovao.

2. Prijedlog Zakona o dugu, zaduživanju i garancijama u Federaciji BiH – hitni postupak

Prijedlog zakona utvrdila je Vlada FBiH.

Prijedlog zakona razmatrala su nadležna radna tijela, o čemu su dostavila izvještaje.

Dodatno obrazloženje dao je pomoćnik federalne ministricе finansija Samir Bakić.

U ime Odbora za ekonomsku i finansijsku politiku obratio se Admir Čavalić.

U diskusiji su učestvovali: Admir Čavalić, Mirza Čelik, Mario Karamatić, Jasmina Bišćević-Tokić, Salko Zildžić, Adnan Efendić, Damir Nikšić, Dennis Gratz, Haris Šabanović,

Edin Smajić, Fahrudin Skopljak, Aner Žuljević, Kadrija Hodžić, Sanel Kajan i Mirsad Zaimović.

3. Prijedlog Zakona o gradu Kiseljaku – skraćeni postupak

Prijedlog Zakona utvrdila je Vlada FBiH.

Prijedlog Zakona razmatrala su nadležna radna tijela, o čemu su dostavila izvještaje.

Dodatno obrazloženje dao je resorni ministar.

U ime Komisije za lokalnu samoupravu Predstavničkog doma obratio se Salko Zildžić.

Prije otvaranja pretresa, predsjedavajući je, na osnovu člana 172. stav 3. Poslovnika, kazao da se ne radi o složenom i obimnom prijedlogu zakona te je stoga pozvao zastupnike da se izjasne hoće li se razmatrati po skraćenom postupku, što je sa 59 glasova *za*, 4 uzdržanih i s 1 glasom *protiv* - usvojeno.

U diskusiji su učestvovali: Damir Nikšić, Melika Mahmutbegović, Admir Čavalić, Haris Šabanović, Ilija Nakić, Adisa Kokić-Hinović, Damir Mašić, Mahir Mešalić, Amir Ibrović, Mirza Čelik, Mirsad Čamdžić, Belmin Zukan i Mladen Bošković.

4. Prijedlog Zakona o izmjenama i dopunama Krivičnog zakona Federacije BiH

Prijedlog Zakona utvrdila je Vlada FBiH.

Prijedlog zakona razmatrala su nadležna radna tijela, o čemu su dostavila izvještaje.

Dodatno obrazloženje dao je resorni ministar.

U ime Komisije za jednakopravnost spolova obratila se Alma Kratina.

Na prijedlog ovog zakona amandmane su dostavili zastupnici: Kokić-Hinović (5), Čavalić i Omerović (1), Hrvić-Šikuljak (7), Bišćević-Tokić (1), Kratina (1), Tokić (1).

U ime Vlade Federacije obratio se i zamjenik premijera Vojin Mijatović.

U diskusiji su učestvovali: Alma Kratina, Lana Prlić, Amra Junuzović-Kaljić, Admir Čavalić, Mahir Mešalić, Melika Mahmutbegović, Kenela Zuko, Marijana Šikuljak-Hrvić, Sanel Kajan, Adisa Kokić-Hinović, Haris Šabanović, Bisenija Mušedinović, Amir Ibrović, Mirjana Marinković-Lepić, Kristina Šimović i resorni ministar.

5. Nacrt Zakona o gasu Federacije BiH

Nacrt Zakona utvrdila je Vlada FBiH.

Nacrt Zakona razmatrala su nadležna radna tijela, o čemu su dostavila izvještaje.

Dodatno obrazloženje dao je resorni ministar.

U ime Odbora za energetiku obratio se Kadrija Hodžić.

U diskusiji su učestvovali Admir Čavalić i Kadrija Hodžić.

6. Program rada Predstavničkog doma Parlamenta Federacije BiH za 2025. godinu

Program rada Predstavničkog doma za 2025. godinu utvrdio je Kolegij.

Prijedlog rada razmatrala su nadležna radna tijela, o čemu su dostavila izvještaje.

U ime Kolegija obratio se predsjedavajući Dragan Mioković.

U ime Odbora za ekonomsku i finansijsku politiku obratio se Admir Čavalić.

U ime Komisije za jednakopravnost spolova obratila se Alma Kratina.

U ime Vlade Federacije obratio se i zamjenik premijera Vojin Mijatović.

U diskusiji su učestvovali Asim Kamber i Admir Čavalić.

7. Izvještaj Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije BiH za 2021., 2022. i 2023. godinu

Parlamentarna komisija odgovorna za reviziju dostavila je izvještaj.

Materijale su zastupnici dobili.

U ime Parlamentarne komisije odgovorne za reviziju obratio se Elvir Karajbić.

U diskusiji su učestvovali zastupnici Admir Čavalić i Elvir Karajbić.

8. Prijedlog zaključka Odbora za ekonomsku i finansijsku politiku Predstavničkog doma Parlamenta Federacije BiH

Odbor za ekonomsku i finansijsku politiku Predstavničkog doma Parlamenta Federacije BiH dostavio je zaključak.

Zaključak su zastupnici dobili.

U ime Odbora za ekonomsku i finansijsku politiku obratio se Admir Čavalić.

U diskusiji su učestvovali zastupnik Čavalić i zastupnica Muratbegović.

Predsjedavajući je iskoristio priliku da pozdravi premijera Nermina Nikšića, zamjenika premijera i ministra finansija Tonija Kraljevića, kao i ministricu Nasihu Pozder.

9. Program rada Vlade Federacije BiH za 2025. godinu

Program rada dostavila je Vlada FBiH.

Program rada zastupnici su dobili.

U ime Vlade FBiH obratio se premijer Nermin Nikšić.

U diskusiji su učestvovali: Mahir Mešalić, Alma Kratina, Kenela Zuko, Admir Čavalić, Elvir Karajbić, Salko Zildžić, Mirsad Zaimović, Mladen Bošković, Mario Karamatić, Jasmina Bišćević-Tokić, Damir Mašić, Haris Šabanović, Elzina Pirić, Melika Mahmutbegović, Amra Junuzović-Škaljić i Fahrudin Skopljak.

10. Izbori i imenovanja

Komisija za izbor i imenovanje je na sjednici održanoj 23. 4. 2025. godine razmatrala zahtjev za razrješenje predsjedavajućeg.

Izvještaje Komisije zastupnici su dobili.

U ime Komisije za izbor i imenovanje obratio se Mladen Bošković.

U diskusiji su učestvovali: Mirza Čelik, Mahir Mešalić, Mladen Bošković, Admir Čavalić, Alma Kratina, Kenela Zuko, Admir Čavalić, Elvir Karajbić, Salko Zildžić, Mirsad Zaimović, Mladen Bošković, Mario Karamatić, Jasmina Bišćević-Tokić, Damir Mašić, Haris Šabanović, Elzina Pirić, Melika Mahmutbegović, Amra Junuzović-Škaljić i Fahrudin Skopljak.

*** Pauza ***

Nakon održane pauze, prozivkom je utvrđen kvorum te je konstatovano da sjednici prisustvuje dovoljan broj zastupnika.

1. Prijedlog Zakona o izmjenama i dopunama Zakona o naftnim derivatima u Federaciji BiH – hitni postupak

Zastupnik Admir Čavalić prihvatio je izjašnjenje Vlade FBiH.

Zastupnik Mladen Bošković prihvatio je izjašnjenje Vlade FBiH.

Na glasanje je stavljen Prijedlog zakona o izmjenama i dopunama Zakona o naftnim derivatima u Federaciji BiH, s jednim amandmanom, koji je Vlada Federacije BiH prihvatila, pa je postao sastavni dio Prijedloga ovog zakona. Sa 72 glasa *za*, 1 uzdržanim i s 5 glasova *protiv* usvojen je Prijedlog Zakona o izmjenama i dopunama Zakona o naftnim derivatima u Federaciji BiH.

Usvojeni amandman

U članu 35. dodaje se stav (15), koji glasi:

“Ministarstvo je dužno kvartalno objavljivati izvještaj o rezultatima nadzora kvaliteta naftnih derivata na službenoj internet-stranici, uključujući i broj uzoraka, a Federalna uprava za inspeksijske poslove će na svojoj službenoj internet-stranici objavljivati odstupanja, prekršaje i izrečene mjere.”

2. Prijedlog Zakona o dugu, zaduživanju i garancijama u Federaciji BiH – hitni postupak

Zastupnik Admir Čavalić prihvatio je izjašnjenje Vlade FBiH.

Zastupnica Jasmina Bišćević-Tokić prihvatila je izjašnjenje Vlade FBiH.

Na glasanje je stavljen Prijedlog Zakona o dugu, zaduživanju i garancijama u Federaciji BiH, u tekstu kako ga je predložila Vlada Federacije BiH. Sa 50 glasova *za*, bez uzdržanih i s 27 glasova *protiv* usvojen je Prijedlog Zakona o dugu, zaduživanju i garancijama u Federaciji BiH, u tekstu kako ga je predložila Vlada Federacije BiH.

Zastupnik Mahir Mešalić zatražio je pojedinačno izjašnjavanje. Nakon pojedinačnog izjašnjavanja - sa 50 glasova *za*, bez uzdržanih i 34 glasa *protiv* navedeni Prijedlog Zakona o dugu, zaduživanju i garancijama u FBiH je prihvaćen.

3. Prijedlog Zakona o gradu Kiseljaku – skraćeni postupak

Zastupnik Bajro Makić nije prihvatio izjašnjenje Vlade FBiH. Na glasanje je stavljen amandman zastupnika Bajre Makića, koji nije prihvaćen.

Na glasanje je stavljen Prijedlog Zakona o gradu Kiseljaku, u tekstu kako ga je predložila Vlada Federacije BiH. Sa 61 glasom *za*, 4 uzdržanih i s 12 glasova *protiv* usvojen je Prijedlog Zakona o gradu Kiseljaku u tekstu kako ga je predložila Vlada Federacije BiH.

Na glasanje je stavljen Prijedlog zaključaka zastupnika Mirze Čelika, koji nije usvojen.

4. Prijedlog Zakona o izmjenama i dopunama Krivičnog zakona Federacije BiH

Glasalo se o predloženim amandmanima zastupnice Adise Kokić-Hinović.

Nakon pojedinačnog izjašnjavanja amandmani nisu prihvaćeni. Zastupnik Admir Čavalić prihvatio je izjašnjenje Vlade FBiH.

Zastupnica Marijana Hrvić-Šikuljak nije prihvatila izjašnjenje Vlade FBiH o amandmanima I., IV., V. i VII. Nakon glasanja nijedan amandman nije prihvaćen.

Zastupnica Alma Kratina prihvatila je izjašnjenje Vlade FBiH.

Zastupnik Stipe Tokić nije prihvatio izjašnjenje Vlade FBiH. Nakon glasanja amandman zastupnika Stipe Tokića nije prihvaćen.

Na glasanje je stavljen Prijedlog zakona o izmjenama i dopunama Krivičnog zakona Federacije BiH. Sa 78 glasova *za*, bez glasova *protiv* i bez uzdržanih, usvojen je Prijedlog

zakona o izmjenama i dopunama Krivičnog zakona Federacije Bosne i Hercegovine, s jednim amandmanom koji je Vlada Federacije BiH prihvatila pa je postao sastavni dio Prijedloga ovog zakona.

Amandman glasi

U članu 38. stav (1) mijenja se i glasi:

“(1) Ko grubo krši uslove koji su propisani zakonom ili propisom donesenim na osnovu zakona, prikuplja, obrađuje ili koristi lične podatke fizičkih osoba, bit će kažnjen kaznom zatvora do jedne godine.”

5. Nacrt zakona o gasu Federacije BiH

Sa 70 glasova *za* jednoglasno je usvojen sljedeći:

Z A K L J U Č A K

1. Predstavnički dom Parlamenta FBiH prihvata Nacrt zakona o gasu Federacije BiH te smatra da može poslužiti kao osnov za izradu Prijedloga zakona.
2. Zadužuje se predlagač da organizuje i provede javnu raspravu u trajanju od 30 dana.
3. Zadužuje se predlagač da prilikom izrade Prijedloga zakona uzme u obzir sve prijedloge, primjedbe i sugestije iznesene u diskusiji, kao i one koje su dostavljene ili će biti dostavljene u pisanoj formi.

6. Program rada Predstavničkog doma Parlamenta Federacije BiH za 2025. godinu

Na glasanje je stavljen Program rada Predstavničkog doma Parlamenta Federacije BiH za 2025. godinu.

Sa 50 glasova *za*, 6 uzdržanih i 19 glasova *protiv* usvojen je Program rada Predstavničkog doma Parlamenta Federacije BiH za 2025. godinu.

7. Izvještaj Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije BiH za 2021., 2022. i 2023. godinu

Na glasanje su stavljeni Zaključci Parlamentarne komisije odgovorne za reviziju.

Sa 64 glasa *za*, 5 uzdržanih i 3 glasa *protiv* usvojeni su sljedeći:

Z A K L J U Č C I

1. Usvaja se 26 (dvadesetšest) izvještaja o obavljenoj finansijskoj reviziji korisnika budžeta Federacije BiH za 2022. i 2023. godinu (revizije u skladu s članom 13. stav 5) Zakona - obavezne revizije).
2. Usvaja se 18 (osamnaest) izvještaja o obavljenoj finansijskoj reviziji korisnika budžeta Federacije BiH za 2021., 2022. i 2023. godinu (revizije u skladu s članom 13. stav 6) Zakona).
3. Usvajaju se 3 (tri) izvještaja o izvršenju budžeta Federacije BiH za 2021., 2022. i 2023. godinu.
4. Usvaja se 15 (petnaest) izvještaja zavoda, fondova, agencija i javnih ustanova u nadležnosti Federacije BiH za 2021., 2022. i 2023. godinu.

5. Usvaja se 29 (dvadesetdevet) izvještaja o reviziji preduzeća u većinskom vlasništvu Federacije BiH za 2021., 2022. i 2023. godinu.
6. Parlamentarna komisija odgovorna za reviziju naglašava važnost revizorskih izvještaja kao ključnog instrumenta za unaprjeđenje transparentnosti i odgovornosti u javnoj upravi te izražava punu podršku Uredu za reviziju u obavljanju njegove nezavisne funkcije, naglašavajući važnost osiguranja odgovarajućih resursa za njegov rad.
7. Traži se od Ureda za reviziju institucija u Federaciji BiH da prilikom davanja svojih preporuka revidiranim subjektima vodi računa o INTOSAI standardima revizije, gdje davanje preporuke može biti upućeno onom subjektu koji tu preporuku može i otkloniti, odnosno ispraviti, a nikako davanje preporuke subjektu za nešto što nije u njegovoj nadležnosti da postupa po njoj.
8. Parlamentarna komisija obavezuje Vladu FBiH (za Izvještaj o izvršenju budžeta FBiH za 2023), njena ministarstva i ostale revidirane budžetske korisnike FBiH (za pojedinačne izvještaje), da do 30. 4. 2025. godine dostave Komisiji i Vladi FBiH izvještaj o preduzetim aktivnostima na provođenju preporuka datih u izvještajima za 2023. godinu, zaključno sa 28. 2. 2025. godine.
- 8.1. Zadužuju se revidirani budžetski korisnici FBiH da u roku od 60 dana dostave Komisiji i Vladi FBiH plan provođenja preostalih preporuka sa definisanim rokovima i odgovornim licima.
- 8.2. Traži se od Vlade FBiH da u roku ne dužem od 60 dana razmotri sva sistematska pitanja proistekla iz dostavljenih izvještaja u tačkama 8. i 8.1. te da predloži sistematska rješenja za implementaciju preporuka i o tome izvijesti Parlament FBiH.
Prilikom razmatranja rješenja potrebno je obuhvatiti sljedeća pitanja i/ili oblasti:
 - iskazana stanja u Glavnoj knjizi Trezora FBiH bivših institucija koje su s federalnog prešli na državni nivo (Federalno ministarstvo odbrane, Vojska FBiH, Carinska uprava i Obavještajno-sigurnosna agencija), koja se odnose na stalna sredstva, kratkoročna potraživanja i plasmane te kratkoročne obaveze i razgraničenja, vršenje popisa imovine i obaveza te utvrđivanja tačnog iznosa obaveza ovih institucija;
 - preduzimanje aktivnosti na efikasnom upravljanju budžetskim sredstvima u skladu sa Zakonom o budžetima u FBiH i Zakonom o izvršavanju budžeta u FBiH, s obzirom na to da je Vlada Federacije BiH, na prijedlog budžetskih korisnika, usvajala programe utroška sredstava tekućih i kapitalnih transfera, iako po prethodnim programima utroška sredstava budžetski korisnici nisu izvršili raspodjelu s jasno utvrđenom svrhom dodjele, mjerljivim kriterijima, transparentno, niti su preduzimali adekvatne mjere i aktivnosti u dijelu nadzora i izvještavanja o namjenskom utrošku sredstava;
 - finansiranje Fonda solidarnosti u skladu sa članom 82. Zakona o zdravstvenom osiguranju;
 - usklađivanje Uredbe o postupku prijema u radni odnos u javnom sektoru s odredbama Zakona o radu, s obzirom na to da je Uredbom ostavljena mogućnost zapošljavanja bez provedene procedure obaveznog javnog oglašavanja, čime nije osigurana transparentnost prilikom zapošljavanja;
 - opravdanost Uredbe o načinu osnivanja i utvrđivanja visine naknade za rad radnih tijela osnovanih od Vlade FBiH i rukovodilaca federalnih organa

državne službe u dijelu formiranja i plaćanja komisija čiji su članovi zaposlenici budžetskih korisnika, kojom su u neravnopravan položaj stavljeni ostali zaposlenici u javnom sektoru (javnih preduzeća, kantonalnih budžetskih korisnika, zaposlenika zavoda) u odnosu na federalne budžetske korisnike;

- obračun naknada članovima komisija - zaposlenicima koji nisu imali tretman plate, odnosno oporezivog prihoda od nesamostalne djelatnosti u skladu sa Zakonom o porezu na dohodak i Zakonom o doprinosima i njihovim provedbenim aktima;
- pitanje usklađenosti Registra budžetskih korisnika FBiH sa Zakonom o budžetima u FBiH i Pravilnikom o utvrđivanju i načinu vođenja registra budžetskih korisnika budžeta FBiH, što utiče na planiranje i realizaciju sredstava za rad Parlamenta FBiH, predsjednika i dva potpredsjednika FBiH.

9. Parlamentarna komisija obavezuje sva revidirana preduzeća da do 30. 4. 2025.

dostave Komisiji i Vladi FBiH izvještaj o preduzetim aktivnostima na implementaciji preporuka datih u izvještajima za 2021., 2022. i 2023. godinu, zaključno sa 28. 2. 2025. godine.

9.1. Zadužuju se revidirana preduzeća da u roku od 60 dana dostave Komisiji i Vladi FBiH plan implementacije preostalih preporuka s jasno definisanim rokovima i odgovornim licima.

9.2. Traži se od Vlade FBiH da u roku ne dužem od 60 dana razmotri sva sistematska pitanja proistekla iz dostavljenih izvještaja u tačkama 9. i 9.1. i pripremi prijedlog mjera te o tome izvjesti Parlament FBiH.

Prilikom razmatranja sistematskih rješenja potrebno je obuhvatiti sljedeća pitanja i/ili oblasti:

- uspostavljanje funkcionalnog sistema internih kontrola prema COSO modelu u skladu sa Zakonom o finansijskom upravljanju i kontroli u javnom sektoru u FBiH, kao i Pravilnikom o provođenju finansijskog upravljanja i kontrole u javnom sektoru u FBiH;
- uspostavljanje Odbora za reviziju i funkcije interne revizije u skladu sa Zakonom o računovodstvu i reviziji u FBiH;
- zapošljavanje obavljati na transparentan način, u skladu sa Zakonom o radu (na osnovu konkursne procedure);
- dosljednu primjenu Zakona o računovodstvu i reviziji u FBiH, međunarodnih računovodstvenih standarda i međunarodnih standarda finansijskog izvještavanja. To se naročito odnosi na priznavanje potraživanja u skladu s MSFI-em 9 – Finansijski instrumenti, pravilno iskazivanje zaliha u skladu s MRS-om 2 – Zalihe, ocjenu umanjenja vrijednosti imovine u skladu s MRS-om 36 – Umanjenje imovine, rezervisanja za izvjesne sudske sporove u skladu sa zahtjevima MRS-a 37 – Rezervisanja, potencijalne obaveze i potencijalna sredstva, kao i sačinjavanja bilješki uz finansijske izvještaje u skladu s MRS-om 1 – Prezentacija finansijskih izvještaja, kao i ocjene da li je pri sastavljanju finansijskih izvještaja izvršena procjena i objavljena sposobnost preduzeća da nastavi poslovati u vremenski neograničenom periodu;
- blagovremeno uplaćivanje obaveza po osnovu doprinosa za penziona i invalidsko osiguranje, zdravstvo i nezaposlenost, u skladu sa Zakonom o doprinosima,

Pravilnikom o načinu obračunavanja i uplate doprinosa i Zakonom o javnim preduzećima;

- detaljno i sveobuhvatno vršenje popisa imovine i obaveza u svim preduzećima, usklađivanje knjigovodstvenog stanja imovine i obaveza sa stvarnim stanjem utvrđenim popisom, kako je propisano Zakonom o računovodstvu i reviziji u Federaciji BiH;
- nabavke roba, usluga i radova vršiti u potpunosti u skladu sa procedurama propisanim Zakonom o javnim nabavkama i provedbenim aktima.

10. Parlamentarna komisija podstiče Ured za reviziju da, u skladu sa raspoloživim resursima, a uvažavajući dostavljene izvještaje, u kontinuitetu vrši reviziju praćenja postupanja po preporukama i o tome izvijesti Komisiju.

11. Parlamentarna komisija obavezuje sve revidirane zavode, fondove, agencije i javne ustanove da do 30. 4. 2025. dostave Komisiji i Vladi FBiH izvještaj o preduzetim aktivnostima na implementaciji preporuka datih u izvještajima za 2021., 2022. i 2023. godinu, zaključno sa 28. 2. 2025. godine.

11.1. Zadužuju se revidirani zavodi, fondovi, agencije i javne ustanove da Komisiji i Vladi FBiH u roku od 60 dana dostave plan implementacije preostalih preporuka s jasno definisanim rokovima i odgovornim licima.

11.2. Traži se od Vlade FBiH da u roku ne dužem od 60 dana razmotri i analizira sistematske probleme koje imaju subjekti iz tačke 11. i pripremi prijedlog mjera i aktivnosti koje je neophodno preduzeti kako bi se otklonili problemi i date preporuke provođenja te o tome izvijesti Parlament FBiH.

Prilikom razmatranja sistematskih problema potrebno je obuhvatiti i sljedeća pitanja:

- zaključivanje ugovora osnivača kliničkih centara (Sveučilišna klinička bolnica Mostar, Univerzitetski klinički centar Sarajevo, Javna zdravstvena ustanova Univerzitetski klinički centar Tuzla) kojima bi se regulisala međusobna prava, obaveze i odgovornosti, što je obaveza propisana Zakonom o ustanovama, Statutom i odlukama o preuzimanju osnivačkih prava. Navedeno je posebno važno u kontekstu člana 41. Zakona o ustanovama, kojim je definisano da osnivači za obaveze ustanove odgovaraju supsidijarno, i to do visine preuzetih obaveza;
- utvrđivanje nadležnosti za naplatu i preduzimanje aktivnosti u vezi sa naplatom posebnog doprinosa u smislu članova 18. i 19. Zakona o profesionalnoj rehabilitaciji, osposobljavanju i zapošljavanju lica s invaliditetom. Pravilnikom o sadržaju i načinu provođenja nadzora nad zakonitošću rada, općih akata i stručnog rada ustanova, privrednih društava, zaštitnih radionica i radnog centra, ova nadležnost data je Federalnom ministarstvu finansija, koje svojim aktima osporava tu nadležnost. Navedeno ima za posljedicu da znatan broj obveznika ne izvršava obavezu uplate posebnog doprinosa;
- prijem u radni odnos po osnovu Uredbe Vlade FBiH o postupku prijema u radni odnos u javnom sektoru u FBiH, kojom je omogućen prijem u radni odnos na određeno vrijeme bez javnog oglašavanja, što nije u skladu sa Zakonom o radu.

11.3. Traži se od Vlade FBiH da u roku ne dužem od 90 dana razmotri i analizira i pojedinačne izvještaje subjekata iz tačke 11. i planove iz tačke 11.1., da preduzme aktivnosti iz svoje nadležnosti s ciljem otklanjanja utvrđenih nepravilnosti i provođenja datih preporuka i o tome izvijesti Komisiju.

12. Komisija upućuje inicijativu Federalnom ministarstvu pravde i Federalnom ministarstvu finansija da razmotri i uskladi poslovanje u skladu s postojećim zakonskim propisima funkcionisanja privrednih jedinica u kazneno-popravnim zavodima te da o preduzetim aktivnostima izvijesti ovu komisiju. U poslovanju privrednih jedinica kazneno-popravnih zavoda nije osigurano sveobuhvatno knjigovodstveno evidentiranje poslovnih promjena, jer se njihovo poslovanje odvija van sistema Glavne knjige Trezora FBiH. Ova praksa rezultirala je nepotpunim finansijskim izvještajima, u kojima nisu prikazani svi elementi imovine i izvora sredstava, što utiče na tačnost i transparentnost finansijskog upravljanja.

Ovo stanje predstavlja kršenje relevantnih zakonskih i podzakonskih akata, uključujući:

1. Zakon o budžetima u FBiH – koji propisuje obavezno i tačno evidentiranje svih budžetskih transakcija, uključujući prihode i rashode institucija u javnom sektoru.
2. Zakon o računovodstvu i reviziji u FBiH – koji nalaže precizno, istinito i sveobuhvatno evidentiranje svih finansijskih transakcija i obaveza.
3. Uredbu o računovodstvu budžeta u FBiH – koja jasno definiše način evidentiranja budžetskih sredstava i finansijskih transakcija javnih institucija.

Posljedice neadekvatnog evidentiranja:

- Neprikazivanje stvarnog finansijskog stanja – Finansijski izvještaji ne odražavaju realne podatke o imovini i obavezama kazneno-popravnih zavoda.
- Otežana fiskalna kontrola – Izostanak evidentiranja kroz Glavnu knjigu Trezora otežava budžetsko planiranje i kontrolu trošenja javnih sredstava.
- Moguće zloupotrebe i netransparentnost – Nepotpune evidencije mogu omogućiti finansijske nepravilnosti i otežati reviziju finansijskog poslovanja.
- Narušavanje fiskalne discipline – Nepoštivanje zakonskih propisa može dovesti do budžetskih nepravilnosti i otežane odgovornosti za upravljanje javnim sredstvima.

Preporuka

Kako bi se obezbjedila zakonitost i transparentnost poslovanja, neophodno je da sve privredne jedinice kazneno-popravnih zavoda usklade svoje knjigovodstvene evidencije sa sistemom Glavne knjige Trezora FBiH. Time bi se obezbjedila potpuna finansijska kontrola, precizno izvještavanje i usklađenost s postojećim zakonima i propisima.

13. Komisija upućuje inicijativu Federalnom ministarstvu zdravstva da za usluge tercijarne zaštite dostavi informaciju Komisiji na koji način klinički centri donose izmjene tarifnika/cjenovnika usluga i da se razmotri mogućnost izmjene tarifnika kako bi se uskladio sa stanjem na tržištu. Velik broj visokodiferenciranih zdravstvenih usluga tercijarnog nivoa koji se pružaju, nemaju definisanu cijenu, odnosno šifru u tarifniku/cjenovniku iz 2008. godine te se takve usluge ne mogu ni fakturisati, a njihovim uvođenjem stvara se još veća razlika između pruženih (fakturisanih) usluga i uplaćenih mjesečnih tranši od zavoda zdravstvenih osiguranja. U dopunama tarifnika/cjenika iz 2008. godine, uz povećanje vrijednosti boda, nije uvršten velik broj visokodiferenciranih usluga, koje se tako ne mogu evidentirati u bolničkom sistemu naplate i predstavljaju velik trošak.

Rješenje je ažurirati, prema realnim tržišnim cijenama i promjenama na tržištu zdravstvenih usluga, tarifnik/cjenovnik, sa hitnom izmjenom visine pojedinačnih tarifnih usluga i uvođenjem novih. Zbog dinamike izmjena cijena na “zdravstvenom tržištu”, neophodno je ugraditi klauzulu koja upućuje na godišnje usklađivanje tarifnika/cjenovnika prema tržišnim promjenama.

Sredstva dobijena raspodjelom prihoda od PDV-a i prihoda od akciza potrebno je usmjeriti prema zdravstvenom sistemu Federacije BiH, zavodima zdravstvenog osiguranja Federacije BiH, odnosno prema krajnjim korisnicima, u ovom slučaju javnim zdravstvenim ustanovama, s obzirom na činjenicu da za to postoji i zakonska obaveza prema Zakonu o pripadnosti javnih prihoda u Federaciji BiH (“Službene novine Federacije BiH”, br. 22/06, 43/08, 35/14, 94/15, 17/22), koji u članu 11. propisuje da se iz budžeta kantona, između ostalog, finansira i zdravstvena zaštita.

Prijedlog rješenja je usmjeravanje dijela sredstava iz prihoda od PDV-a i akciza prema zdravstvenom sektoru, Federalnom fondu zdravstvenog osiguranja i kantonalnim zavodima zdravstvenog osiguranja, koji će ta sredstva dalje raspodjeljivati prema bolnicama, jedinici realizovane zdravstvene usluge, kao i prema kantonima, a za izdvajanje budžetskog planiranja u zdravstvu.

14. Zadužuje se Parlamentarna komisija odgovorna za reviziju da, prema odgovarajućoj procjeni, a u saradnji sa Uredom za reviziju institucija u FBiH i nadležnim predstavnicima Vlade FBiH, poziva revidirane subjekte na zasebne sastanke i o tome u kontinuitetu izvještava Parlament FBiH, sve u cilju jačanja nadzora nad realizacijom zaključaka i osiguranja kontinuiteta izvještavanja Parlamenta FBiH o poslovanju revidiranih subjekata i provođenju ovih zaključaka.

15. Parlamentarna komisija odgovorna za reviziju intenzivirat će saradnju sa Uredom za reviziju kako bi poboljšala provođenje preporuka, uz zajedničke sastanke i razmjenu podataka o stešenu provođenja preporuka te preduzimati potrebne aktivnosti na izvještavanju Parlamenta FBiH i javnosti.

16. Traži se od Vlade Federacije BiH da donese ili eventualno izmijeni postojeće propise, koji se odnose na poslovanja “firmi kćeri” javnih preduzeća, a čije je sjedište u Federaciji BiH, gdje je Vlada Federacije BiH većinski vlasnik, na način da firme kćeri podliježu istim propisima kao i njihova matična preduzeća, koja su ih i osnovala.

8. Prijedlog zaključka Odbora za ekonomsku i finansijsku politiku Predstavničkog doma Parlamenta Federacije BiH

Na glasanje je stavljen Prijedlog zaključka Odbora za ekonomsku i finansijsku politiku Predstavničkog doma Parlamenta Federacije BiH. Predstavnički dom Parlamenta Federacije nije usvojio zaključak Odbora za ekonomsku i finansijsku politiku ovog doma koji se odnosi na uključivanje privatnih predškolskih ustanova u odredbe sufinansiranja, odnosno subvencioniranja propisanih Uredbom Vlade Federacije, jer prilikom glasanja Prijedlog zaključka nije dobio potrebnu većinu glasova zastupnika.

9. Program rada Vlade Federacije BiH za 2025. godinu

Predstavnički dom Parlamenta Federacije razmatrao je i primio na znanje Program rada Vlade Federacije BiH za 2025. godinu.

10. Izbori i imenovanja

Na glasanje je stavljen Zaključak o formiranju Odbora za istragu i praćenje aktivnosti u vezi sa sanacijom šteta prouzrokovanih poplavama i klizištima iz oktobra 2024. godine, kojim su za članove Odbora izabrani sljedeći zastupnici: Fuad Abaspahić, Amir Purić, Ajla Milišić-Pepić, Marijan Marjanović, Amir Ibrović, Haris Šabanović, Luka Faletar i Sandi Salkić. Navedeni zaključak je usvojen sa 69 glasova *za*, 3 uzdržanih i 1 glasom protiv.

Predsjedavajući je zaključio rad 21. redovne sjednice u 23:34 sati.

Transkript i prijepis transkripta čine sastavni dio ovog zapisnika.

SEKRETAR
PREDSTAVNIČKOG DOMA
PARLAMENTA FEDERACIJE BiH

Ivan Miličević

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BiH

Dragan Mioković